



Inatsisartut ilassutitut aningaasaliissutitut inatsisissaannut siunnersuut 2023.

(Aningaasaqarnermut Akileraartarnermullu Naalakkersuisoq)

(Siullermeerneqarnera)

Illassutitut aningaasaliissutitut inatsit ukiut tamaasa uteqqiattup ukiumi pineqartuni, aningaasartuutit pilersaarutaasimangitsut takussusertarpaat. Taamaammallu aningaasat pineqarlutik, atorneqareersimasut, taamaattumillu maannakkut sunniuteqarfigisinnaanngisagut, ilassutitut aningaasaliissutitut inatsisip Inatsisartuni akuersissutigisariaqalernerani.

Demokraatinut pingaaruteqartuaannarpoq, aningaasatigut akisussaassusilimmik ingerlatsiuarnissaq tassani aningaasatigut akisussaassusilimmik missingersuusiortarnissaq. Akuersaarparput, ukiup ataatsip ingerlanerani naatsorsuutigingisanik aningaasartuutissanik saqqummertoqarsinnaanera – tamanna pissusissamisoorluinnarpoq. Imaalinngisaannarlili, pissusissamisuuginnartutut isigissagipput, ukiut tamaasa annertuallaanik ilassutitut aningaasaliissutitut aningaasartuuteqartarnissaa.

2021 aamma 2022 ajoraluartumik takuarput, Naalakkersuisunit ilassutitut aningaasaliissutitut qinnuteqaatit nunatta aningaasartuutaanik ajorseriartitserujussuarnera 150 millioner koruuninik aammalu 277 millioner koruuninik. Tamanna tunngavigalugu Naalakkersuisut piumaffigaakka missigersuutunik pivusorpalaarnerusunik sanasarnissaq qulakkiissagaa. Naammagisimaarpara, Naalakkersuisut kajumissaarutiga malissimagunarmassuk. Pivusormi imaammat, ilassutitut aningaasaliissutitut qinnuteqaatit Nunatta Karsia 2023-imi 250.000 koruuniinnarnik ajorseriartissimammassuk. Kajumissaarutigissavara, ingerlaarfik taanna ukiuni tulliuttuni malinneqassasoq.

Taamatut oqaaseqaateqarlunga nalunaarutigissavara, Demokraatit una siunnersuut akuerineqartussatut innersuummassuk aammalu Aningaasaqarnermut- aamma Akileraartarnermullu ataatsimiititaliami aappassaaneerneqannginnerani oqaluuserisassatut.